

四庫全書

集部

欽定四庫全書

東坡詩集註卷三十一

宋 王十朋 撰

和陶詩

追和陶淵明詩引 子由作

東坡先生謫居僭耳寘家羅浮之下獨與幼子過負
檐度海葺茅竹而居之日啗藟芋而華屋玉食之念
不存於胸中平生無所嗜好以圖史為園囿文章為

鼓吹至是亦皆罷去獨猶喜為詩精深華妙不見老人衰憊之氣是時轍亦遷海康書來告曰古之詩人有擬古之作矣未有追和古人者也追和古人則始於吾吾於詩人無所甚好獨好淵明之詩淵明作詩不多然其詩質而實綺癯而實腴自曹劉鮑謝李杜諸人皆莫及也吾前後和其詩凡一百有九篇至其得意自謂不甚愧淵明今將集而併錄之以遺後之君子其為我志之然吾於淵明豈獨好其詩也哉如

其為人實有感焉淵明臨終疏告儼等吾少而窮苦
每以家弊東西游走性剛才拙與物多忤自量為已
必貽俗患黽勉辭世使汝等幼而饑寒淵明此語蓋
實錄也吾真有此病而不早自知半生出仕以犯世
患此所以深愧淵明欲以晚節師範其萬一也嗟乎
淵明不肯為五斗米一束帶見鄉里小兒而子瞻出
仕三十餘年為獄吏所折困終不能悛以陷大難乃
欲以桑榆之末景自托於淵明其誰肯信之雖然子

瞻之仕其出處進退猶可攷也後之君子其必有以處之矣孔子曰述而不作信而好古竊比於我老彭孟子曰曾子與子思同道區區之迹蓋未足以論士也轍少而無師子瞻既冠而學成先君命轍師焉子瞻嘗稱轍詩有古人之風自以為不若也然自其斥居東坡其學日進沛然如川之方至其詩比李太白杜子美有餘遂與淵明比轍雖馳驟從之而常出其後其和淵明轍繼之者亦一二焉丁丑十二月海康

城南東齋引

和時運四首

丁丑二月十四日白鶴峯新居成自嘉祐寺遷入詠
淵明時運詩云斯晨斯夕言息其廬似為余發也乃
次其韻長子邁與余別三年矣挈攜諸孫萬里遠至
老朽憂患之餘不能無欣然

我卜我居居非一朝龜不吾欺食此江郊廢井已塞喬
木干霄昔人伊何誰其裔苗

下有碧潭可飲可濯江山千里供我遐矚木固無脛瓦
豈有足陶匠自至嘯歌相樂

我視此邦如洙如沂邦人勸我老矣安歸自我幽獨倚
門或揮豈無親友雲散莫追

旦朝丁丁誰欸我廬子孫遠至笑語紛如翦髮垂髻一作
翦綠垂髻覆此瓠壺三年一夢乃復見余

和勸農六首

海南多荒田俗以貿香為業所產秔稌不足於食乃

以諸芋雜米作粥糜以取飽余既哀之乃和淵明勸
農詩以告其有知者

咨爾漢黎均是一民鄙夷不訓夫豈其真怨忿劫質尋
戈相因欺謾莫訴曲自我人

天禍爾土不麥不稷民無用物怪珍是殖播厥薰木腐
餘是穡貪夫污吏鷹鷲狼食

豈無良田膴膴平陸獸蹤交締鳥喙諧穆驚磨朝射猛
狝夜逐芋羹藜糜以飽者宿

聽我苦言其福永久利爾鋤耜好爾鄰偶斬艾蓬藿南
東其畝父兄措槌以扶游手

天不假易亦不汝匱春無遺勤秋有厚冀雲舉雨決婦
姑畢至我良孝愛袒跣何愧

逸諺戲侮博奕頑鄙投之生黎俾勿冠履霜降稻實千
箱一軌大作爾社一醉醇美

和停雲四首

自立冬以來風雨無虛日海道斷絕不得子由詩乃

和淵明停雲詩以寄

停雲在空黯其將雨嗟我懷人道修且阻眷此區區
仰再撫良辰過鳥逝不我佇

颺作海渾天水溟濛雲屯九河雲立三江我不出門寤
寐北牕念彼海康神馳往從

凜然清灑落其驕榮魄真化之廓兮忘情萬里遲子晨
興宵征遠虎在側以寧先生

對奕未終摧然斧柯再游蘭亭默數永和夢幻去來誰

少誰多彈指太息浮雲幾何

和歸田園居六首

三月四日游白水山佛迹巖沐浴于湯泉晞髮于懸
瀑之下浩歌而歸肩輿却行以與客言不覺至水北
荔枝浦上晚日葱曨竹陰蕭然時荔子纍纍如芡實
矣有父老八十五指以告余曰及是可食公能攜酒
來游乎意忻然許之歸卧既覺聞兒子過誦淵明歸
園田居詩六首乃悉次其韻始余在廣陵和淵明飲

酒二十首今復為此要當盡和其詩乃已耳今書以
寄妙總大士參寥子

環州多白水際海皆蒼山以彼無盡景寓我有限年東
家著孔丘西家著顏淵市為不二價農為不爭田周公
與管蔡恨不茅三間我飽一飯足薇蕨補食前門生饋
新米救我厨無烟斗酒與隻雞酣歌餞華顛禽魚豈知
道我適物自閒悠悠未必爾聊樂我所然

窮猿既投林疲馬初解鞅心空飽新得境孰夢餘想江

鷗漸馴集蟹叟已還往南池綠錢生北嶺紫笋長提壺
豈解飲好語時見廣春江有佳句我醉墮渺莽

新浴覺身輕新沐感髮稀風乎懸瀑下却行詠而歸仰
觀江搖山俯見月在衣步從父老語有約吾敢違

老人八十餘不識城市娛造物偶遺漏同儕盡丘墟平
生不渡江水北有幽居手插荔枝子合抱三百株莫言
陳家紫甘冷恐不如君來坐樹下飽食攜其餘歸舍遺
兒子懷抱不可虛有酒持飲我不問錢有無

坐倚朱藤杖行歌紫芝曲不逢商山翁見此野老足願

同荔枝社長作雞黍局教我同光塵月固不勝燭霜颯

散氛侵廓然似朝旭

莊子云月固不勝火郭象曰大而暗不若小而明陋哉斯言也余為

更之曰明於大者必晦於小月能燭天地而不能燭毫釐此其所以不勝火也然卒之火勝月勝耶

昔我在廣陵悵望柴桑陌長吟飲酒詩頗獲一笑適當

時已放浪朝坐夕不夕矧今長閒人一劫展過隙江山

互隱見出沒為我役斜川追淵明東臯友王績詩成竟

何為六博本無益

五月旦日作和戴主簿

海南無冬夏安知歲將窮時時小搖落榮悴俛仰中上
天信包荒佳植無由豐鉏耰代肅殺有擇非霜風手栽
蘭與菊侑我清宴終擷芳眼已明飲酒腹尚冲草去土
自墮井深墻愈隆勿笑一畝園蟻垤齊衡嵩

酬劉柴桑

紅萼與紫芽遠插墻四周且放幽蘭春莫爭霜菊秋窮
冬出甕益磊落勝農疇淇上白玉延

淇上出山藥
一名玉延

能復

過此不一飽忘故山不思馬少游

與殷晉安別

和送昌化軍使
張中罷官赴闕

孤生知永棄末路嗟長勤久安儋耳陋日與雕題親
海國此竒士官居我東鄰卯酒無虛日夜棋有達晨小甕
多自釀一瓢時見分仍將對牀夢伴我五更春暫聚水
上萍忽散風中雲恐無再見日笑談來生因空吟清詩
送不救歸裝貧

和王撫軍座送客

再送
張中

胸中有佳處海瘴不能腓三年無所愧十口今同歸汝
去莫相憐我生本無依相從大塊中幾合幾分違莫作
往來相而生愛見悲悠悠含山日炯炯留清暉懸知冬
夜長不恨晨光遲夢中無與別作詩記忘遺

和答龐參軍

三送
張中

留燈坐達曉要與影晤言下帷對古人何暇復窺園使
君本學武少誦十三篇頗能口擊賊戈戟亦森然才智
誰不如功名嘆無緣獨來向我說憤懣當奚宣一見勝

百聞往鑿皋蘭山白衣挾三矢趨此征遼年

形贈影

天地有常運日月無閒時孰居無事中作止推行之細
察我與汝相因以成茲忽然乘物化豈與生滅期夢時
我方寂偃然無所思胡為有哀樂輒復隨漣沍我舞汝
凌亂相應不少疑還將醉時語答我夢中辭

影答形

丹青寫君容常恐畫師拙我依月燈出相肖兩奇絕妍

媼本在君我豈相媚悅君如火上烟火盡君乃別我如
鏡中像鏡壞我不滅雖云附陰晴了不受寒熱無心但
因物萬變豈有竭醉醒皆夢爾未用議優劣

神釋

二子本無我其初因物著豈惟老變衰念念不如故知
君非金石安足長託附莫從老君言亦莫用佛語仙山
與佛國終恐無是處堪欲隨陶翁移家酒中住醉醒要
有盡未易逃諸數平生逐兒戲處處餘作具所至人聚

觀指日生毀譽如今一弄火好惡都焚去既無負戴勞
又無寇攘懼仲尼晚乃覺天下何思慮

怨詩楚調示龐主簿鄧治中

當歡有餘樂在戚亦頽然淵明得此理安處故有年嗟
我與先生所賦良竒偏人間少宜適惟有歸耘田我昔
墮軒冕毫釐真市廛困來卧重裯憂愧自不眠如今破
茅屋一夕或三遷風雨睡不知黃葉滿枕前寧當出怨
句慄慄如孤烟但恨不早悟猶推淵明賢

九日間居

明日重九雨甚展轉不能寐起坐索酒和淵明一篇
醉熟昏然殆不能佳也

九日獨何日欣然愜平生四時靡不佳樂此古所名龍
山憶孟子栗里懷淵明鮮鮮霜菊艷溜溜糟牀聲聞居
知今節樂事滿餘齡登高望雲海醉覺三山傾長歌振
履商起舞帶索榮坎坷識天意淹留見人情但願飽秬
稌年年樂秋成

和移居二首

余去歲三月自水東嘉祐寺遷居合江樓迨今年
多病寡歡頗懷水東之樂也得歸善縣後隙地數畝
父老云古白鶴觀也意欣然欲居之乃和此詩

昔我初來時水東有幽宅晨與烏鵲朝暮與牛羊夕誰
令遷近市日有造請役歌呼雜閭巷鼓角鳴枕席出門
無所詣樂事非夙昔病瘦獨彌年東新誰與析

洄潭轉碕岸我作江郊詩今為一屢氓此地乃得之葺

為無邪齋思我無所思古觀廢已久白鶴歸何時我豈
丁令威千歲復還茲江山朝福地古人不吾欺

歲暮作和張常侍

十二月二十五日酒盡取米欲釀米亦竭時吳遠游
陸道士客於余因讀淵明歲暮和張常侍亦以無酒
為歎乃用其韻贈二子

我生有天祿元膺流玉泉何事陶彭澤乏酒每形言仙
人與道士自養豈在繁但使荆棘除不憂梨棗愆我年

六十一頽景薄西山歲暮似有得稍覺散亡還有如千
丈松常苦弱蔓纏養我歲寒枝會有解脫年米盡初不
知但覺饑鼠遷二子真我客不醉亦陶然

和郭主簿二首

清明日聞過誦書聲節閒美感念少時悵然追懷先
君宮師之遺意且念淮德二幼孫無以自遣乃和淵
明二篇隨意所寓無復倫次也

今日復何日高槐布初陰良辰非虛名清和盈我襟孺

子卷書坐誦詩如鼓琴却念四十年玉顏如汝今閉戶
未嘗出出為鄰里欽家世事酌古百史手自斟當年二
老人喜我作此音淮德入我夢角羈未勝簪孺子笑問
我君何念之深

雀鷖含淳音竹萌抱靜節

此兩句先君火
時詩失其全首

誦我先君詩

肝肺為澄澈猶為鳴鶴和未作獲麟絕願因騎鯨李追
此御風列丈夫貴出世功名豈人傑家書三萬卷獨取
服食訣地行即空飛何必挾日月

示周續之祖企謝景夷三郎

時游城東
學舍作

聞有古學舍竊懷淵明欣攝衣造兩塾窺戶無一人邦
風方杞夷廟貌猶殷因先生饌已缺弟子散莫臻忍飢
坐談道嗟我亦晚聞永言百世紀未補平生勤今此復
何國豈與陳蔡鄰永愧虞仲翔絃歌滄海濱

和答龐參軍六首

周循州彦質在郡二年書問無虛日罷歸過惠為余
留半月既別和此詩送之

我見異人且得異書挾書從人何適不娛羅浮之趾卜
我新居而非玄德三顧我廬

旨酒荔蕉絕甘分珍雖云晚接數面自親海隅一笑豈
云無人無酒酤我或乞其隣

將行復止眷言孜孜苟有于中傾倒出之奕奕千言粲
焉陳詩觴行筆落了不容思

非妙侍側兩髦了分歌舞壽我永為歡欣曲終悽然仰
視浮雲此曲此聲何時復聞

擊鼓其鏜船開艣鳴顧我而言雨泣載零子卿白首當
還西京遼東萬里亦歸管寧

感子至意託辭西風吾生一塵寓形空中願言謙亨君
子有終功名在子何異我躬

和連雨獨飲二首

吾謫海南盡賣酒器以供衣食獨有一荷葉盃工製
美妙留以自娛乃和淵明連雨獨飲

平生我與爾舉意輒相然豈止磁石鍼雖合猶有間此

外一子由出處同偏僂晚景最可惜分飛海南天糾纏

一作

不吾欺寧此憂患先顧影一盃酒誰謂無往還寄

語海北人今日為何年醉裏有獨覺夢中無雜言

阿堵不解醉誰歟此頽然誤入無功鄉掉臂嵇阮間飲

中八仙人與我俱得僂淵明豈知道醉語忽談天偶見

此物真遂趨天地先醉醒可還酒此覺無所還清風洗

徂暑連雨催豐年牀頭伯雅君此子可與言

和贈羊長史

得鄭會嘉靖老書欲於海舶載書千餘卷見借因讀
淵明贈羊長史詩云愚生三季後慨然念黃虞得知
千載事上賴古人書次其韻以謝鄭君

我非皇甫謐門人如摯虞不特兩鷗酒肯借一車書欲
令海外士觀經似鴻都結髮事文史俯仰六十踰老馬
不耐放長鳴思服輿故知根塵在未免病藥俱念君千
里足歷塊猶跼躅好學真伯業比肩可相如此書久已
孰救我今荒蕪顧慙桑榆迫豈厭詩酒娛奏賦病未能

草玄老更疎猶當距楊墨稍欲懲荆舒

和乞食

莊周昔貸粟猶欲春脫之魯公亦乞米炊煮尚不辭淵
明端乞食亦不避嗟來嗚呼天下士死生寄一杯斗水
何所直遠汲愁姜詩幸有餘薪米養此老不才至味久
不壞可為子孫貽

和胡西曹示顧賊曹

長春如稚女飄搖倚輕颺卯酒暈玉頰紅綃卷生衣低

顏香自歛含睇意頗微寧當娣黃菊未肯似戎葵誰言
此弱質閱歲觀盛衰頽然疑薄怒沃盥未可揮瘴雨吹
蠻風凋零豈容遲老人不解飲短句餘清悲

游斜川和正月五日與兒子過出游作

謫居澹無事何異老且休雖過靖節年未失斜川游春
江淥未波人卧船自流我本無所適汎汎隨鳴鷗中流
遇洄洄捨舟步曾丘有口可與飲何必逢我儔過子詩
似翁我唱兒輒酬未知陶彭澤頗有此樂不問點爾何

如不與聖同憂問翁何所笑不為由與求

和已酉歲九月九日

十月初吉菊始開乃與客作重九因次韻淵明已酉
歲九月九日一首胡廣飲菊潭水而壽然李固傳贊
云其視胡廣趙戒猶糞土也

今日我重九誰謂秋冬交黃花與我期草中實後凋香
餘白露乾色映青松高悵望南陽野古潭霏慶霄伯始
真糞土平生夏畦勞飲此亦何益內熱中自焦持我萬

家春一酹五柳陶夕英幸可掇繼此木蘭朝

和癸卯歲始春懷古田舍二首

儋人黎子雲兄弟居城東南躬農圃之勞偶與軍使
張中同訪之居臨大池水木幽茂坐客欲為釀錢作
屋余亦欣然許之名其屋曰載酒堂用淵明始春懷
古田舍韻作二首

退居有成言垂老竟未踐何曾淵明歸屢作敬通免休

閒等一味妄想生愧覩

淵明本用緬字
聊取其同音字

聊將自知明稍

積在家善城東兩黎子室邇人自遠呼我釣其池人魚
兩忘返使君亦命駕恨子林塘淺

茅茨破不補嗟子乃爾貧菜肥人亦瘦竈閒井常勤我
欲致薄少解衣勸坐人臨池作虛堂雨急瓦聲新客來
有美載果熟多幽欣丹荔破玉膚黃柑溢芳津借我三
畝地結茅為子隣鳩舌倘可學化為黎母民

和飲酒二十首

吾飲酒至少常以把杯為樂往往頽然坐睡人見其

醉而吾中了然蓋莫能名其為醉為醒也在揚州時
飲酒過午輒罷客去解衣盤礴終日歡不足而適有
餘因和淵明飲酒二十首庶以髣髴其不可名者示
舍弟子由晁无咎學士

我不如陶生世事纏綿之云何得一適亦有如生時寸
田無荆棘佳處正在茲縱心與事往所遇無復疑偶得
酒中趣空杯亦常持

二豪詆醉客氣湧胸中山漼然忽冰釋亦復在一言畱

氣實其腹云當享長年少飲得徑醉此祕君勿傳

道喪士失已出語輒不情江左風流人醉中亦求名淵
明獨清真談笑得此生身如受風竹掩冉衆葉驚俯仰
各有態得酒詩自成

蠹蠕食葉蟲仰空慕高飛一朝傳兩翅乃得粘網悲啁
啾厭巢雀沮澤疑可依赴水生兩殼遭閉何時歸二蟲
竟誰是一笑百念衰幸此未化間有酒君莫違

小舟真一葉下有暗浪喧夜棹醉中發不知枕几偏天

明問前路已度千金山嗟我亦何為此道常往還未來
寧早計既往復何言

百年六十化念念竟非是是身如虛空惟受譽與毀得
酒未舉杯喪我固忘爾倒牀自甘寢不擇管與綺

頃者大雪年海派翻玉英有士常痛飲饑寒見真情牀
頭有敗榼孤坐時一傾未能平體粟且復澆腸鳴脫衣
裏凍酒每醉念此生

我坐華堂上不改麋鹿姿時來蜀岡頭喜見霜松枝心

知百尺底已結千歲竒煌煌凌霄花纏繞復何為舉觴
酹其根無事莫相羈

芙蓉在秋水時節自闔開清風亦何意入我芝蘭懷一
隨採折去永與江湖乖斷絲不復續斗水何足栖不如
玉井蓮結根天池泥感此每自慰吾事幸不諧酒中有
歸路了了初不迷乘流且復逝抵曲吾當迴

籃輿兀醉守路轉古城隅酒力如過雨清風消半途前
山正可數後騎且勿驅我緣在東南往寄白髮餘遙知

萬松嶺下有三畝居

民勞吏無德，歲美天有道。暑雨避麥秋，溫風送蠶老。三
咽初有間，一溉未濡槁。詔書寬積欠，父老顏色好。再拜
賀吾君，獲此不貪寶。頽然笑阮籍，醉几書謝表。

我夢入小學，自謂總角時。不記有白髮，猶誦論語辭。人
間本兒戲，顛倒畧似茲。惟有醉時真，空洞了無疑。墜車
終無傷，莊叟不吾欺。呼兒具紙筆，醉語輒錄之。

醉中雖可樂，猶是生滅境。元何得此身，不醉亦不醒。癡

如景升牛莫保尻與領黠如東郭魏束縛作毛穎乃知
嵇叔夜非坐虎文炳

我家小馮君天性頗純至清坐不飲酒而能容我醉歸
休要相依謝病當以次豈知山林士翫醜乃爾貴乞身
當念早過是恐少味

去鄉三十年風雨荒舊宅惟存一束書寄食無定迹每
用愧淵明尚取禾三百頽然六男子粗可傳清白於吾
豈不多何事復歎惜

曉曉六男子絃誦各一經復生五丈夫戢戢丁欲成歸
田了門戶與國充踐更普兒初學語玉骨開天庭淮老
如鶴雖破殼已能鳴舉酒屬千里一歡愧凡情

淮海雖故楚無復輕揚風齋厨聖賢雜無事時一中誰
言大道遠正賴三杯通使君不夕坐衙門散刀弓

何人築東臺一郡坐可得亭亭古浮圖獨立表衆惑蕪
城闕興廢雷塘幾開塞明年起華堂置酒弔亡國無令
竹西路歌吹久寂默

晁子天麒麟結交及未仕高才固難及雅志或類已各
懷伯業能共有丘明耻歌呼時就君指我醉鄉里吳國
門下客賈誼獨見紀請作鵬鳥賦我亦得坎止行樂當
及時綠髮不可恃

蓋公偶談道齊相獨適真頽然不事事客至先飲醇當
時劉項罷四海創痕新三杯洗戰國一斗銷彊秦寂寥
千載後陽公嗣前塵醉卧客懷中言笑徒多勤我時閱
舊史獨與三人親未暇餐脫粟苦心學平津草書亦何

用醉墨淋衣巾一揮三十幅持去聽坐人

和止酒

丁丑歲余謫海南子由亦貶雷州五月十一日相遇
於藤同行至雷六月十一日相別渡海余時病瘁呻
吟子由亦終夕不寐因誦淵明詩勸余止酒乃和元
韻因以贈別庶幾真止矣

時來與物逝路窮非我止與子各意行同落百蠻裏蕭
然兩別駕各攜一稚子子室有孟光我室惟法喜相逢

山谷間一月同卧起茫茫海南北粗亦足生理勸我師
淵明力薄且為已微痾坐杯勺止酒則瘳矣望道雖未
濟隱約見津溪從今東坡室不立杜康祀

還舊居和夢歸惠州白鶴山居作

痿人常念起夫我豈忘歸不敢夢故山恐興墳墓悲生
世本暫寓此身念念非鶩城亦何有偶捨鶴毳遺窮魚
守故沼聚沫猶相依大兒當門戶時節供丁推夢與鄰
翁言憫默憐我衰往來付造物未用相招麾

和始作鎮軍叅軍經曲阿

虞人非其招欲往畏簡書穆生責醴酒先見我不如江
左古弱國強臣擅天衢淵明墮詩酒遂與功名疎我生
值良時朱金義當紆天命適如此幸收廢棄餘獨有愧
此翁大名難久居不思犧牛龜兼取熊掌魚北郊有大
齊南冠解囚拘眷言羅浮下白鶴返故廬

和庚戌歲九月中於西田穫早稻

蓬頭二獠奴誰謂愿且端晨興洒掃罷飽食不自安願

治此圃畦少資主游觀畫功不自覺夜氣乃潛還早韭
欲爭春晚菘先破寒人間無正味美好出艱難早知農
圃樂豈有非意干尚恨不持鉏未免駢我顏此心苟未
降何適不間闕休去復歇去菜食何所歎

和丙辰歲八月中於下溼田舍獲

聚糞西垣下鑿泉東垣隈勞辱何時休宴安不可懷天
公豈相喜雨霽與意諧黃菘養土羔老楮主樹雞未忍
便烹煮繞觀日百迴跨海得遠信冰盤鳴玉哀茵陳點

贈縷照坐如花開一與蜚叟醉蒼顏兩摧頽齒根日浮
動自與梁肉乖食菜豈不足一作好呼兒折雞栖

和乙巳歲三月為建威叅軍使都經錢溪

喬木卷蒼藤浩浩崩雲積謝家堂前燕對語悲宿昔仰
看枕椰樹元鶴舞長翮新年結荔子主人黃壤隔溪陰
宜館我稍省薪水役相如賣車騎五畝亦可易但恐鵬
鳥來此生還蕩析誰能插籬槿護此殘竹栢和游城北謝氏廢園

作

辛丑七月赴假還江陵夜行途中作口號

和郊行
步月

缺月不蚤出長林踏青冥犬吠主人怒愧此閭里情怪
我夜不歸茜袂窺紫荆雲間與地上待我兩友生驚鵲
再三起樹端已微明白露淨原野始覺丘陵平暗蛩方
夜績孤螢亦宵征歸來閉戶坐寸田且默耕莫赴花月
期免為詩酒縈詩人如布穀聒聒常自名

和詠二疎

二疎事漢時迹寓心已去許侯何足道寧識此高趣可

憐魏丞相免冠謝陋舉中興多名臣有道獨兩傳世途
方轂擊誰肯行此路是身如委蛻未蛻何所顧已蛻則
兩忘身後誰毀譽所以遺子孫買田豈先務我常游東
海所歷若有素神交久從君屢夢今乃悟淵明作詩意
妙想非俗慮庶幾二大夫見微而知著

和詠三良

此生太山重忽作鴻毛遺三子死一言所死良已微賢
哉晏平仲事君不以私我豈犬馬哉從君求蓋帷殺身

故有道大節要不虧君為社稷死我則同其歸顧命有
治亂臣子得從違魏顆真孝愛三良安足希仕宦豈不
榮有時纏憂悲所以靖節翁服此黔婁衣

和詠荆軻

秦如馬後牛呂氏非復嬴天欲厚其毒假手李客卿功
成志自滿積惡如陵京滅身會有時徐觀可安行沙丘
一狼狽笑落冠與纓太子不少忍顧非萬人英魏韓裂
智伯肘足本無聲胡為棄成謀託國此狂生荆軻不足

說田子老可驚燕趙多奇士惜哉亦虛名殺父囚其母
此豈容天庭亡秦只三戶况我數十城漸離雖不傷陞
戟加周營至今天下人愍燕欲其成廢書一太息可見
千古情

和讀山海經十三首

陶淵明讀山海經十三首其七首皆仙語余讀抱朴
子有所感用其韻賦之

今日天始霜衆木斂以疎幽人掩窻卧明景翻空廬開

心無良友寓眼得奇書建德有遺民道遠我無車無糧
食自足豈謂穀與蔬愧此稚川翁千載與我俱畫我與
淵明可作三士圖學道雖恨晚賦詩豈不如

稚川雖獨善愛物均孔顏欲使螻蛄流知有龜鶴年
辛勤破封執苦語劇移山博哉無窮利千載食此言

淵明雖中壽雅志仍丹丘遠矣無懷民超然邈無儔
奇文出曠息豈復生死流我欲作九原異世為三游

子政信奇逸妙算窮陰陽淮仙枕中訣養鍊歲月長豈

伊吳濁中爭此頃刻光安知青藜火丈人非中黃

亂離棄弱女破冢割恩憐寧知効龜息三歲號窮山長
生定可學當信仲弓言支牀竟不死抱一無窮年

三山在咫尺靈藥非草木玄芝生太元黃精出長谷仙
都浩如海豈不供一浴何當從山火東緼分寸燭

蜀士李八百穴居吳山陰默坐但形語從者紛如林其
後有李寬鷄鵠非同音口耳固多偽識真要在心

黃華育甘谷靈根固深長廖井窖丹砂紅泉湧尋常二

女戲口耳

一作鼻

松膏以為糧聞此不能寐起坐夜未央

談道鄙俗儒遠自太史走仲尼實不死於聖亦何負紫
文出吳宮丹雀本無有遼哉廣桑君獨顯三季後

金丹不可成安期渺雲海誰謂黃門妻至道乃近在支
解竟不傳化去空餘悔金成亦安用御氣本無待

鄭君故多方玄翁所親指竒文二百篇了未出生死素
書在黃石豈敢辭跪履萬法等成壞金丹差可恃

古強本妄庸蔡誕亦夸士曼都斥仙人謁帝輕舉止學

道未有得自欺誰不爾稚川亦隘人疏錄此庸子
東坡信畸人涉世真散材仇池有歸路羅浮豈徒來踐
蛇及茹蠱心空了無猜攜手葛與陶歸哉復歸哉

和雜詩十一首

斜日照孤隙始知空有塵微風動衆竅誰信我忘身一
笑問兒子與汝定何親從我來海南幽絕無四鄰耿耿
如缺月獨與長庚晨此道固應爾不當怨尤人

故山不可到飛夢隔五嶺真游有黃庭閉目寓兩景

境

室空無可照火滅膏自冷披衣起視夜海濶河漢水西
窓半明月散亂梧楸影良辰不可繫逝水無留騁我苗
期後枯持此一念靜

真人有妙觀俗子多妄量區區勸粒食此豈知子房我
非徒跣相終老懷未央兔死縛淮陰狗功指平陽哀哉
亦可羞世路皆羊腸

相如偶一官嗤鄙劉父老不記犢鼻時滌器混傭保著
書曾幾許渴肺灰土燥琴臺有遺魄笑我歸不早作書

遺故人皎皎我懷抱餘生幸無愧可與君平道

孟德黠老狐姦言啖鴻豫哀哉喪亂世梟鸞各騰翮逝
者知幾人文舉獨不去天方斲漢室豈計一郝慮昆蟲
正相齧乃比蘭相如我知公所坐大名難久住細德方
險微豈有容公處既往不可悔庶為來者懼

博大古真人老聃闢尹喜獨立萬物表長生乃餘事稚
川差可近倘有接物意我頃登羅浮物色恐相值徘徊
朱明洞沙水自清駛滿把菖蒲根歎息復棄置

藍橋近得道常苦世褊迫西游王屋山不踐長安陌爾
來寧復見烏道度太白昔與吳遠游同藏一瓢窄潮陽
隔雲海晚歲倘見客代薪供養火看作栖鳳宅

南榮晚聞道未肯化庚桑陶頑鑄強獷枉費塵與糠越
子古成之韓生教休糧叅同得靈鑰九鎖啓伯陽鷲城
見諸孫貧苦我為傷空餘焦先室不傳元化方遺像似
李白一奠臨江觴

餘齡難把玩妙解寄筆端常恐抱永歎不及丘明遷親

友復勸我放心餞華顛虛名非我有至味知誰餐思我
無所思安能觀諸緣已矣復何歎舊說易兩篇

申韓本自聖陋古不復稽巨君縱獨愆借經作巖崖遂
令青衿子珠璧人人懷鑿齒井蛙耳信謂天可彌大道
久分裂破碎日愈離我如終不言誰悟角與羈吾琴豈
得已昭氏有成虧

我昔登胸山出日觀滄涼欲濟東海縣恨無石橋梁今
茲黎母國何異于公鄉蠓浦既黏山暑路亦飛霜所欣

非自罔不怨道里長

和擬古九首

有客叩我門繫馬門前柳庭空鳥雀散門閉客立久主
人枕書卧夢我平生友忽聞剥啄聲驚散一杯酒倒裳
起謝客夢覺兩愧負坐談雜今古不答顏愈厚問我何
處來我來無何有

酒盡君可起我歌已三終由來竹客人不數濤與戎有
酒從孟公慎勿從揚雄岢嶇頌沙麓塵埃汗西風昔我

未嘗達今者亦安窮窮達不到處我在阿堵中

客去室幽幽鵬鳥來坐隅引吭伸兩翮太息意不舒吾
生如寄耳何者為我廬去此復何之少安與汝居夜中
聞長嘯月露荒榛蕪無問亦無答吉凶兩何如

少年好遠游蕩志隘八荒九夷為藩籬四海環我堂盧
生與若士何足期杳茫稍喜海南州自古無戰場竒峯
望黎母何異嵩與邛飛泉瀉萬仞舞鶴雙低昂分汜未
入海膏澤彌此方芋魁倘可飽無肉亦奚傷

馮洗古烈婦翁媪國于茲策勳梁武後開府隋文時二
世更險易一心無磷緇錦傘平積亂屏渠破餘疑廟貌
空復存碑板漫無辭我欲作銘誌慰此父老思遺民不
可問樓句莫余欺犧牲菌雞卜我當一訪之銅鼓壺盧
笙歌此迎送詩

沈香作庭燎甲煎紛相和豈若注微火縈煙嫋清歌貪
人無飢飽胡椒亦求多朱劉兩狂子隕隊如風花本欲

竭澤漁柰此明年何

朱初平劉誼欲冠帶
黎人以取水沈耳

雞窠養鶴髮及與唐人游來孫亦垂白頗識李崖州再
逢盧與丁閱世真東流斯人今在亡未遽掩一丘我師
吳季子守節到晚周一見春秋未渺焉不可求

城南有荒池瑣細誰復採幽姿小芙蓉香色獨未改欲
為中州信浩蕩絕雲海遙知玉井蓮落落不相待攀躋
及少壯已矣一作失那容悔

黎山有幽子形槁神獨完負薪入城市笑我儒衣冠生
不聞詩書豈知有孔顏儵然獨往來榮辱未易闕日暮

鳥獸散家在孤雲端問答了不通歎息指屢彈似言君
貴人草莽栖龍鸞遺我吉貝布海風今歲寒

和東方有一士

併居本近危甌墜知不完夢求亡楚弓笑解適越冠忽
然反自照識我本來顏歸路在脚底穀渾失重關屢從
淵明游雲山出臺端借君無絃物寓我非指彈豈惟舞
獨鶴便可躡飛鸞還將嶺茅瘴一洗月關寒

此東方一士正淵明

也不知從之游者誰乎若了得此一段我即淵明淵明即我也

和貧士七首

余遷惠州一年衣食漸窘重九將近樽俎蕭然乃和
淵明貧士詩七首以寄許下高安宜興諸子姪并令
過同作

長庚與殘月耿耿如相依以我旦暮心惜此須臾暉青
天無今古誰知織烏飛我欲作九原獨與淵明歸俗子
不自悼顧憂斯人飢堂堂誰有此千駟良可悲

夷齊耻周粟高歌誦虞軒產祿彼何人能致綺與園古

來避世士死灰或餘烟末路益可羞朱墨手自研淵明
初亦仕絃歌本誠言不樂乃徑歸視世差獨賢

誰謂淵明貧尚有一素琴心閒手自適寄此無窮音佳
辰愛重九芳菊起自尋疎中歎虛漉塵爵笑空斟忽餉
二萬錢顏生良足欽思送酒家保勿違故人心

人皆有耳目夫子曠與婁弱毫寫萬象水鏡無停酬閒
居惜重九感此歲月周端如孔北海只有尊空憂二子
不並世高風兩無儔我後五百年清夢未易求

芙蓉雜金菊枝葉長闌干遙憐退朝人
醪酒出太官豈

知江海上下落英亦可餐
典衣作重陽徂歲慄將寒無衣

粟

一作寒

我膚無酒擲我顏貧居真可歎
二事長相關

老詹亦白髮

惠州太守詹
範字器之

相對垂霜蓬賦詩殊有味涉

世非所工杖藜山谷間狀類渤海龔
半道要我飲意與

王弘同有酒我自至不須遣龐通
門生與兒子杖履聊

相從

我家六兒子流落三四州辛苦更不識
今與農圃儔買

田帶脩竹築室依清流未能遣一力分汝薪水憂坐念
北歸日此勞未易酬我獨遺以安鹿門有前修

和桃花源詩

世傳桃源事多過其實者淵明所記止言先世避秦
亂來此則漁人所見似是其子孫非秦人不死者也
又云殺雞作食豈有仙而殺者乎舊說南陽有菊水
水甘而芳民居三十餘家飲其水皆壽或至百二三
十歲蜀青城山老人村有見五世孫者道極險遠生

不識鹽醢而溪中多枸杞根如龍蛇飲其水故壽近
歲道稍通漸能致五味而壽亦益衰桃源蓋此比也
歟使武陵太守得而至焉則已化為爭奪之場久矣
嘗意天壤之間若此者甚衆不獨桃源余在潁州夢
至一官府人物與俗間無異而山川清遠有足樂者
顧視堂上榜曰仇池覺而念之仇池武都氏故地楊
難當所保余何為居之明日以問客客有趙令時德
麟者曰公何為問此此乃福地小有洞天之附庸也

杜子美蓋云萬古仇池穴潛通小有天神魚人不見
福地語真傳近接西南境長懷十九泉何時一茅屋
送老白雲邊他日工部侍郎王欽臣仲至謂余曰吾
嘗奉使過仇池有九十九泉萬山環之可以避世如
桃源也

凡聖無異居清濁共此世心閒偶自見念起忽已逝欲
知真一處要使六用廢桃源信不遠藜杖可小憩躬耕
任地力絕學抱天藝臂雞有時鳴尻駕無可稅苓龜亦

晨吸杞狗或夜吠耘樵得甘芳齧齧謝炮製子驥雖形
隔淵明已心諳高山不難越淺水何足厲不知我仇池
高舉復幾歲從來一生死近又等癡慧蒲澗安期境在廣
川羅浮稚川界夢往從之游神交發吾蔽桃花滿庭下
流水在戶外却笑逃秦人有畏非真契

和劉柴桑

萬劫互起滅百年一跼蹐漂流四十年今乃言卜居且
喜天壤間一席亦吾廬稍理蘭桂藪盡平狐兔墟黃櫨

出舊枿紫茗抽新畬我本早衰人不謂老更劬邦君助
番鍾鄰里通有無竹屋從低深山窓自明疎一飽便終
日高眠忘百須自笑四壁空無妻老相如

問淵明

子知神非形何異復人天豈惟三才中所在靡不然我
引而高之則為日星懸我散而卑之寧非山與川三皇
雖云沒至今在我前八百要有終彭祖非永年皇皇謀
一醉發此露槿妍有酒醉不辭無酒斯飲泉立善求我

饜飢人食饒涎委運憂傷生運去生亦遷縱浪大化中
正為化所纏應盡便須盡寧復俟此言

歸去來集字十首 并序

予喜淵明歸去來詞因集字為十詩

命駕欲何向欣欣春木榮世人無往復鄉老有逢迎雲
內流泉遠風前飛鳥輕相攜就衡宇酌酒話交情
涉世恨形役告休成老夫良欣就歸路不復向迷途去
去徑猶菊行行田欲蕪情親有還往清酒引樽壺

與世不相入膝琴聊盡歡風光歸笑傲雲物寄游觀言
語審無倦心懷良獨安東臯清有趣植杖日盤桓

雲岫不知遠巾車行復前僕夫尋老木童子引清泉矯
首獨傲世委心懷樂天農人告春事扶老向良田

世事非吾事駕言鄉路尋向時迷有命今日悟無心亭
內菊歸酒窻前風入琴寓形知己老猶未倦登臨

富貴良非願鄉關歸去休攜琴已尋壑載酒復經丘翳
翳景將入涓涓泉欲流老農人不樂我獨與之遊

觴酒命僮僕言歸無復留輕車尋絕壑孤棹入清流乘
化亦安命息交還絕游琴書樂三逕老矣亦何求
歸去復歸去帝鄉安可期烏還知己倦雲出欲何之入
室常攜幼臨流亦賦詩春風吹獨斷不是傲親知

役役倦人事來歸車載奔征夫問前路稚子候衡門入
室亦詩策少遊常酒樽交親書已絕雲壑自相存

寄傲知今是求榮感昨非聊欣樽有酒不恨室無衣丘
壑世情遠田園生事微庭柯還獨暝時有鳥歸飛

和歸去來兮辭

子瞻謫居昌化追和淵明歸去來辭蓋以無何有之鄉為家雖在海外未嘗不歸云爾

歸去來兮吾方南遷安得歸卧江海之瀕洞弔鼓角之
悽悲迹泥蟠而愈深時電往而莫追懷西南之歸路夢
良是而覺非悟此生之何常猶寒暑之異衣豈襲裘而
念葛蓋得猶而喪微我歸甚易匪馳匪奔俯仰還家下
馬闔門藩垣雖闕堂室故存挹我天醴注之窪樽飲月

露以洗心餐朝霞而眩顏混客主以為一俾婦姑之相
安知盜竊之何有乃扃門而折闕廓圓鏡以外照納萬
象而中觀治廢井以晨吸瀟百泉之夜還守極靜以自作
時爵躍而鯢桓歸去來兮請終老於斯游我先人之弊
廬復舍此而焉求均海南與漠北挈往來而無憂畸人
告余以一言非八卦而九疇方饑須糧已濟無舟忽人
牛之皆喪但喬木與高丘驚六用之無成自一根之反
流望故家而求息曷中道而三休已矣乎吾生有命歸

有時我初無行亦無留駕言隨子聽所之豈以師南華
而廢從安期謂易稼之終枯遂不溉而不耔師淵明之
雅放和百篇之新詩賦歸來之清引我其後身蓋無疑

東坡詩集註卷三十一

欽定四庫全書

東坡詩集註卷三十二

明 王十朋 撰

樂府

竹枝歌

并序
忠州作

竹枝歌本楚聲幽怨惻怛若有所深悲者豈亦往昔
之所見有足怨者歟夫傷二妃而哀屈原思懷王而
憐項羽此亦楚人之意相傳而然者且其山川風俗

鄙野勤苦之態固已見於前人之作與子由之詩故
特緣楚人疇昔之意為一篇九章以補其所未道者
蒼梧山高湘水深中原北望度千岑帝子南遊飄不返
唯有蒼蒼楓桂林楓葉蕭蕭桂葉碧萬里遠來超莫及
乘龍上天去無蹤草木無情空寄泣水濱擊鼓何喧闐
相將叩水求屈原屈原死已今千載滿船哀唱似當年
海濱長鯨徑千尺食人為糧安可入招君不歸海水深
海魚豈解哀忠直吁嗟忠直死無人可惜懷王西入秦

續秦昭王遺楚懷王書願與君王會武關懷王至則聞
武關遂與西至咸陽懷王大悔亡歸不得遂發病卒于
秦楚人
秦關已閉無歸日章華不復見車輪君王去時
憐之

簫鼓咽父老送君車軸折

續漢景帝徵臨江王榮既上車車軸折臨江父老流涕曰

吾王不返矣

千里逃歸迷故鄉南公哀痛彈長鈇三戶亡秦

信不虛

續南公有言楚雖三戶亡秦必楚

一朝兵起盡歡呼當時項羽

年最少提劍本是耕田夫橫行天下竟何事棄馬烏江

馬垂涕項王已死無故人首入漢庭身委地

續項羽自立為西楚

伯王及敗至烏江以所乘馬與烏江亭長漢騎圍之乃自刎王翳取其頭餘四人各分其一體

富貴榮

華豈足多至今猶有塚嵯峨故國淒涼人事改楚鄉千古為悲歌

上堵吟

子仁水經注堵陽縣有堵水傍有白馬塞孟達為新城守登之而歎曰劉封中虬據

金城十里而更失之遂為上堵吟音韻哀切有側人心今水次尚歌之堵水蓋入沔者也

臺上有客吟秋風悲聲蕭散飄入空臺邊游女來竊聽
欲學聲同意不同君悲竟何事千里金城兩穉子白馬
為塞鳳為關山川無人空且閒我悲亦何苦江水冬更

深編魚冷難捕

子仁編魚襄陽所出孟浩然所謂槎頭縮項編

悠悠江上聽歌

人不知我意徒悲辛

野鷹來

子仁水經注沔水南有層臺號曰景升臺蓋荊州牧劉表所築表好鷹嘗登此臺歌

野鷹來曲其聲似

孟達上堵吟云

野鷹來萬山下荒山無食鷹苦飢飛來為爾繫綵絲北
原有兔老且白年年養子秋食菽我欲擊之不可得年
深兔老鷹力弱野鷹來城中有臺高崔巍臺中公子著
皮袖東望萬里心悠哉心悠哉鷹何在嗟爾公子歸無
勞使鷹可呼亦凡曹天陰月黑狐夜嘍

襄陽樂

子仁南史劉道產為襄陽太守善於臨職
蠻服歸順百姓樂業由此有襄陽樂歌自

道產

始

使君未來襄陽愁提戈入市襄羶裘自從羶裘南渡沔

襄陽無事多春遊襄陽春遊樂何許岷山之陽漢江浦

使君朱旆來翻翻人道使君似羊杜

子仁羊祜杜預皆
鎮襄陽有德政

道邊逢人問洛陽中原苦戰春田荒北人聞道襄陽樂

目送征鴻應斷腸

四時詞

春雲陰陰雪欲落東風吹冷驚羅幕漸看遠水綠生漪

未放小桃紅入萼

子仁選詩山桃發紅萼

佳人瘦盡雪膚肌

子仁莊子

藐姑射之神人肌膚若冰雪綽約若處子

眉斂春愁知為誰

子仁李白詩美人捲朱簾獨坐

嬋蛾眉但見淚痕濕不知心恨誰

深院無人剪刀響應將白紵作春衣

子仁柳子厚詩春衫裁白紵

垂柳陰陰日初永蔗漿酪粉金盤冷

子仁宋玉招魂云膳鬻魚羔有蔗漿

簾額低垂紫鸞忙蜜脾已滿黃蜂靜

次公李商隱詩花房與蜜脾雄蜂蛺

蝶 雌 高樓睡起翠眉顰枕破斜紅未肯勻

鮫白樂天詩斜紅不暈赭面女

玉腕半揎雲碧袖樓前知有斷腸人

子仁小說載詩
揎新玉腕斜

新愁舊恨眉生綠粉汗餘香在蘄竹

次公蘄竹簞也

象牀素手

熨寒衣

次公通鑑孟嘗君受象牀孫杜詩美人細意熨貼平裁縫減盡針線跡

爍爍風燈

動華屋夜香燒罷掩重扃香露空濛月滿庭抱琴轉軸

無人見門外空聞裂帛聲

續樂天琵琶行云轉軸撥絃三兩聲未成曲調先有情又

云曲終收撥當心畫
四絃一聲如裂帛

霜葉蕭蕭鳴屋角黃昏斗覺羅裳薄夜風搖動鎮帷犀

厚杜牧杜秋娘詩虎睛
珠絡祿金盤犀鎮帷

酒醒夢回聞雪落起來呵手畫

雙鷓

次公杜逸詩迎旦東風騎蹇驢旋呵手煖凍髭鬚

醉臉輕勻視眼霞真態

生香誰畫得玉奴纖手嗅梅花

絳玉奴齊廢帝東昏侯妃潘氏也

古纏頭曲

鷓絃鐵撥世無有

絳唐開元中賀懷智善琵琶以石為槽鷓雞筋作絃用鐵撥彈之

樂

府舊工惟尚叟一生喙硬眼無人坐此困窮今白首翠

鬟女子年十七指法已似呼韓婦驚帆渡海風掣迴滿

面塵沙和淚垢青衫不逢濫浦客

援白樂天言送客濫浦口聞舟中夜彈琵琶

琶問其人本長安倡女年長色衰嫁為商人婦樂天為作琵琶行末云就中泣下誰最多江州司馬青衫濕

紅袖謾插曹綱手

續琵琶錄曹綱運撥如風雨裴興奴長於攏撚人謂綱有右手奴有左手

樂天詩誰能截得曹綱手插向重蓮衣袖中

爾來一見哀駘佗

厚莊子衛有惡人曰哀駘

佗婦人見之請於父母曰與為人妻寧為夫子妾者數十而未止也

便著臂鞵躬井臼

次公

史記滑稽傳淳于髡云若親有嚴客髡奉鞵鞠騰侍酒於前注鞵臂捍也又東方朔傳董君綠憤傳鞵注云鞵即今臂鞵也縮馮衍妻任氏悍妬不畜妾媵常自操井臼厚傳育食祿數十年秩奉盡贍給知友妻子不免操

井我慙貧病百不足強對黃花飲白酒轉關漢索動有

神堯卿樂譜琵琶曲有轉關六么漢索梁州皆其名也

雷輶空堂戰臆膈

續唐僧善木彈

綠腰曲下撥一聲如雷發妙絕入神

四絃一抹擁袂立

子仁樂天琵琶行曲終收撥當心畫

四絃一聲
如裂帛

再拜十分為我壽世人只解錦纏頭

厚唐開元中富

人王元寶嘗會賓客明日親友問之曰昨來高會
有何高談元寶不答視屋良久曰但費錦纏頭耳

與汝

作詩傳不朽

續麗人行

李仲謀家有周昉畫背面欠伸內人極精戲作此詩謝名畫記云周昉字景玄

官至宣

州長史

深宮無人春日長沉香亭北百花香

續開元中禁中重牡丹得四本紅紫

淺紅通白者上植于興慶池東沉香亭前會花方繁開上與太真妃遊賞命李龜年持金花牋宣賜翰林供奉李白進清平詞詞三章其三曰名花傾國兩相歡長得君王帶笑看解釋春風無限恨沉香亭北倚闌干事見

樂史李翰林文集序堯卿唐明皇美人睡起薄梳洗燕
以外國貢沉香材而作沉香亭

舞鶯啼空斷腸

次公孟郊詩鶯啼燕語春城裏

畫工欲畫無窮意背立

東風初破睡

次公溫庭筠詩背立鞦韆下

若教回首却嫣然陽城下

蔡俱風靡

厚宋玉賦東家之子嫣然一笑感陽城迷下蔡堯卿陽城下蔡二縣名楚之貴介公子所

封杜陵飢客眼長寒

堯卿杜子美自謂衣不蓋體常寄食於人奔走不暇常恐轉死溝壑

可謂飢客矣又詩云秋山眼冷兔未歸

蹇驢破帽隨金鞍隔花臨水時一

見只許腰肢背後看

厚杜甫麗人行背後何所見珠壓腰肢穩稱身心醉歸來

茅屋底方信人間有西子

次公西子字出孟子

君不見孟光舉案

與眉齊

援梁鴻至吳為人債春每歸妻孟光為具食舉案齊眉

何曾背面傷春啼

薄命佳人

雙頰凝酥髮抹漆眼光入簾珠的皪

厚古詩的皪沈珠淵次公先生詩集

一本云為試經者作

則眼光入簾是也

故將白練作仙衣

次公冷齋夜話載則天長壽三

年詔書曰應天下尼

當用細白練為衣

不許紅膏汗天質吳音嬌軟帶兒

癡無限閒愁總不知自古佳人多命薄

子仁古樂府有妾命薄曲

門春盡楊花落

於潛女

青裙縞袂於潛女兩足如霜不穿屨

續李白詩屨上足如霜下著鴉頭襪

簪沙鬢髮絲穿杼

次公退之月蝕詩赤鳥司南方尾秃翅簪沙杼當作杼字書杼同楮字耳

於絲穿之下無義杼說文曰機之持緯者絲穿杼言鬢如絲之穿杼也

蓬沓障前走風雨

老澤宮粧傳父祖

厚老澤吳王澤也杜牧之詩老澤即山鑄後庭千蛾眉此指吳越王錢氏

也至今遺民悲故主苔溪楊柳初飛絮照溪畫眉渡溪

去逢郎樵歸相媚媼不信姬姜有齊魯

程齊女姜姓魯女姬姓古詩雖

有姬姜無棄憔悴

薄薄酒二首

并引

膠西先生趙明叔家貧好飲不擇酒而醉常云薄薄
酒勝茶湯醜醜婦勝空房其言雖俚而近乎達故推
而廣之以補東州之樂府既又以為未也復自和一
篇聊以發覽者之一噓云爾

薄薄酒勝茶湯麤麤布勝無裳醜妻惡妾勝空房五更

待漏靴滿霜不如三伏日高睡足北窓涼

厚陶潛夏日
虛開高卧北

憲之珠襦玉柙萬人祖送歸北邙

次公漢哀帝豫以東
園祕器珠襦玉柙賜

董賢北邙山在河南偃
師東北王公多葬其地

不如懸鷄百結獨坐負朝陽厚

夏衣若懸鶉董京衣百結宋國有田夫嘗衣緼袍自曝於日顧其妻曰負日之暄人莫知欲獻之於君生

前富貴死後文章百年瞬息萬世忙夷齊盜跖俱亡羊

援莊子臧與穀相與牧羊而俱亡其羊問臧奚事則扶册讀書問穀奚事則博塞以遊二人者事業不同其於亡羊均也伯夷死名於首陽之下盜跖死利於東陵之上二人所死不同其於殘生傷性均也

前一醉是非憂樂都兩忘

薄薄酒飲兩鐘麤麤布著兩重美惡雖異醉煖同醜妻

惡妾壽乃公

次公前漢高帝紀幾敗乃公事

隱居求志義之從本不計

較東華塵土北牕風

次公東華門百官入朝所從出入之門也

百年雖長要

有終富死未必輸生窮但恐珠玉留君容千載不朽遭

樊崇

厚後漢赤眉賊帥樊崇陷長安發掘諸陵取其寶貨凡所發有玉柙殮者率皆如生故赤眉多得行

淫穢文章自足欺盲聾誰使一朝富貴面發紅子功古樂府今日牛

羊上丘隴當時

達人自達酒何功

子仁白樂天嘗作酒功贊

世間是

非憂樂本來空

太白辭 并引

岐下頻年大旱禱於長白山輒應故作迎送神辭一

篇五章

雷闐闐山晝晦風振野神將駕載雲旱從玉虬早既甚
蹙往救道阻脩兮

旌旗翻疑有無日慘變神在塗飛赤篆訴閻闔走陰符
行羽檄萬靈集兮

風為幄雲為蓋滿堂爛神既至紛醉飽錫以雨百川溢
施溝渠歌且舞兮

騎裔裔車班班鼓簫悲神欲還轟振凱隱林谷執妖厲
歸獻馘千里肅兮

神之來悵何晚山重複路幽遠神之去飄莫追德未報
民之思永萬祀兮

上清辭

君胡為乎山之幽顧宮殿兮久淹留又曷為一朝去此
而不顧兮悲此空山之人也來不可得而知兮去固不
可得而訊也君之來兮天門空從千騎兮駕飛龍隸辰
星兮役太歲儼晝降兮雷隆隆朝發軫兮帝庭夕弭節
兮山宮曠有妖兮虛下土精為星兮氣為虹愛流血之

滂沛兮又嗜瘧癘與螟蟲嘯盲風而涕淫雨兮時又吐
旱火之熾融銜帝命以下討兮建千仞之脩鋒乘飛霆
而追逸景兮歛若掃滅而無蹤忽崩播其來會兮走海
嶽之神公龍車獸鬼不知其數兮旗纛晦靄而冥蒙漸
俯偃以旅進兮鏘劔珮之相礮司殺生之必信兮知上
帝之不汝容既約束以反職兮退戰慄而愈恭澤充塞
於四海兮獨澹然其無功君之去兮天門開欵闔闔兮
朝玉臺羣仙迎兮塞雲漢儼前導兮紛後陪歷玉階兮

帝迎勞君良苦兮馬虺頽閔人世兮迫隘陳下土兮帝
所哀返瓊宮之嵯峨兮役萬靈之喧阗默清靜以無為
兮時節狩於斗魁詣通明而獻黜陟兮軼蕩蕩其無回
忽表裏之煥霍兮光下燭於九陔時遊目以下覽兮五
嶽為亘四溟為杯俯故宮之千柱兮若毫端之集埃來
非以為樂兮去非以為悲謂神君之既返兮曾顏咫尺
之不違陞祕殿以內悻兮魂凜凜而上馳忽寤寐以有
得兮敢沐浴而獻辭是邪非邪臣不可得而知也

黃泥坂辭

出臨臯而東鶩兮並叢祠而北轉走雪堂之坡陀兮歷
黃泥之長坂大江洶以左繚兮渺雲濤之舒卷草木層
累而右附兮蔚柯丘之葱蒨余旦往而夕還兮步徙倚
而盤桓雖信美不可居兮苟娛余於一盼余幼好此竒
服兮襲前人之詭幻老更變而自哂兮悟驚俗之來患
釋寶輅而被繒絮兮雜市人而無辨路悠悠其莫往來
兮守一席而窮年時游步而遠覽兮路窮盡而旋反朝

嬉黃泥之白雲兮暮宿雪堂之青煙
喜魚鳥之莫余驚兮幸樵蘇之我慢
初被酒以行歌兮忽放杖而醉偃草
為茵而塊為枕兮穆華堂之清燕
紛墜露之濕衣兮升素月之團團
感父老之呼覺兮恐牛羊之予踐
於是蹶然而起起而歌曰月明兮星稀
迎余往兮餞余歸歲既晏兮草木腓
歸去來兮黃泥不可以久嬉

清溪辭

大江南兮九華西汎秋浦兮亂清溪水
渺渺兮山無蹊

路重複兮居者迷爛青紅兮架高低松千里兮稻千畦
山無人兮雲朝挂藹濛濛兮淪淪嘯林谷兮號水泥
走鼉鼉兮下鳧鷖忽孤壘兮隱重堤杳冥茫兮聞犬雞
鬱萬瓦兮鳥翼齊浮軒楹兮飛拱枿鴈南歸兮寒蜩嘶
弄秋水兮挹玻璃朝市合兮雜耄覲挾簞瓢兮佩鋤犁
鳥獸散兮相扶攜隱鷺雷兮鷺長蜺望翠微兮古招提
躋木杪兮翔雲梯若有人兮悵幽栖石為門兮雲為闥
塊虛堂兮法喜婁呼猿狙兮子鹿麋我欲往兮奉杖藜

獨長嘯兮謝阮嵇

竹枝詞

自過鬼門關外天命同人鮪甕頭船北人墮淚南人笑
青嶂無梯問杜鵑

歸來引

送王子立歸筠州

歸去來兮世不汝求胡不歸洵北望之橫流兮渺西顧
之塵霏紛野馬之決驟兮幸余首之未鞿出彭城而南
騫兮眷丘隴而增歎亂清淮而俯鑒兮驚昔容之是非

念東坡之遺老兮輕千里而款余扉共雪堂之清夜兮
攬明月之餘輝憎雞黍之未熟兮歎空室之蚺蟻我挽
袖而莫留兮僕夫在門歌式微歸去來兮路渺渺其何
極將稅駕於何許兮北江之南南江之北於此有人兮
儼峩峩其豐碩孰居約而爾肥兮非糠覈其何食久抱
一而不試兮愈溫溫而自克吾居世之荒浪兮視昏昏
而聽默默非之子莫振吾過兮久不見恐自賊吾舍此
而道無由兮子何畏而不即將以彼為玉人兮以子為


之璞也

醉翁操 并引

瑯邪幽谷山水竒麗泉鳴空澗若中音會醉翁喜之
把酒臨聽輒欣然忘歸既去十餘年而好竒之士沈
遵聞之往游以琴寫其聲曰醉翁操節奏疎宕而音
指華暢知琴者以為絕倫然有其聲而無其辭翁雖
為作歌而與琴聲不合又依楚詞作醉翁引好事者
亦倚其詞以製曲雖粗合均度而琴聲為詞所繩約

非天成也後三十餘年翁既捐館舍而遵亦沒久矣
有廬山玉澗道人崔閒特妙於琴恨此曲之無詞乃
譜其聲而請於東坡居士以補之云

琅然清園誰彈響空山無言惟翁醉中知其天月明風
露娟娟人未眠荷蕢過山前曰有心也哉此賢醉翁嘯
詠聲和流泉醉翁去後空有朝吟夜怨山有時而童顛
水有時而回川思翁無歲年翁今為飛仙此意在人間
試聽徽外三兩絃



東坡詩集卷三十二